

ra tout maintenant foüetté en ta presence. On fait venir le petit garçon ; quand les Sauvages veirent que c'estoit tout de bon qu'on despoüilloit ce petit batteur de Sauvages & de tambour, & que les verges estoient toutes prestes, ils commencerét à prier qu'on luy pardonnast, alleguans que c'estoit vn enfant, qu'il n'auoit point d'esprit, qu'il ne scauoit pas encor ce qu'il faisoit; mais comme on le vouloit chastier à toute force, l'vn d'eux se met tout nud, iette sa robe sur l'enfant, s'écriant à celuy qui le vouloit frapper; touche sur moy, si tu veux, mais tu ne le frapperas point : voila comme le pauvre petit euada. Toutes les nations Sauvages de ces quartiers, & du Brasil, à ce qu'on nous témoigne, ne scauroient chastier ny voir chastier vn enfant: que cela nous donnera de peine dans le dessein que nous